

## CHAPITRE II.

## DE L'ESTAT GENERAL DE LA MISSION.

**I**E puis dire que iamais ce pays n'a esté plus auant dans l'affliction, que nous l'y voyons maintenant, & que iamais la Foy n'y a paru avec plus d'auantage. Les Hiroquois ennemis de ces peuples continuent avec eux vne guerre sanglante, qui va exterminant nos bourgades frontieres, & qui fait craindre aux autres vn semblable mal-heur: & Dieu en mesme temps va peuplant d'excellens Chrestiens ces pauvres Nations desolées, & se plaißt à y establir son saint Nom au milieu de leurs ruines.

Depuis nostre derniere Relation nous auons baptizé pres de treize cens personnes: mais ce qui nous console le plus est de voir la ferueur de ces bons Neophytes, & vn esprit de Foy en eux, qui n'a rien de [11] la barbarie, & qui nous fait benir les misericordes de Dieu, qui se vont respendant de iour en iour si richemēt iufqu'aux derniers confins de ce nouveau monde.

L'Esté dernier se passa quasi entier dans les attentes & les alarmes d'une armée ennemie des Hiroquois nos voisins, qui fut la cause que les Hurons ne descendent point à Quebec, estans demeurez pour defendre leur pays menacé; & craignans aussi d'autre part vne autre armée des Hiroquois Annieronnonns, qui les attendoient au passage, s'ils eussent descendu la Riuiere. Ainsi nous ne receufmes l'an passé aucun